

後漢書

三七

蘇州

後漢書志第十

天文上

劉昭

注補

王莽三

光武十二

易曰天垂象聖人則之庖犧氏之王天下
仰則觀象於天俯則觀法於地觀象於天
謂日月星辰觀法於地謂水土州分形成
於下象見于上故曰天者北辰星合元垂
耀建帝形運機授度張百精三階九列二
十七大夫八十一元士斗衡太微攝提之

屬百二十官二十八宿各布列下應十二

子天地設位星辰之象備矣

星經曰歲星主泰山徐州青州

兗州熒惑主霍山楊州荊州交州鎮星主嵩高山豫州太白主華陰山涼州雍州益州辰星主恒山翼州

幽州并州歲星主角亢氏房心尾箕熒惑主與鬼柳七星張翼軫鎮星主東井太白金奎婁胃昂畢觜參

辰星主斗牛女虛危室壁琰璣者謂北極星也王衡者謂斗九星也王衡第一星主徐州常以五子日候

之甲子為東海丙子為琅邪戊子為彭城庚子為下邳壬子為廣陵凡五郡第二星主益州常以五亥日

候之乙亥為漢中丁亥為永昌己亥為巴郡蜀郡牂牁辛亥為廣漢癸亥為犍為凡七郡第三星主冀州

常以五戌日候之甲戌為魏郡勃海丙戌為安平戌戌為鉅鹿河間庚戌為清河趙國壬戌為恒山凡八

郡第四星主荊州常以五卯日候之乙卯為南陽己卯為零陵辛卯為桂陽癸卯為長沙丁卯為武陵凡

五郡第五星主兗州常以五辰日候之甲辰爲東郡
陳留丙辰爲濟北戊辰爲山陽泰山庚辰爲濟陰壬
辰爲東平任城凡八郡第六星主揚州常以五巳日
候之乙巳爲豫章辛巳爲丹陽己巳爲廬江丁巳爲
吳郡會稽癸巳爲九江凡六郡第七星爲豫州常以
五午日候之甲午爲潁川壬午爲梁國丙午爲汝南
戊午爲沛國庚午爲魯國凡五郡第八星主幽州常
以五寅日候之甲寅爲玄菟丙寅爲遼東遼西漁陽
庚寅爲上谷代郡壬寅爲廣陽戊寅爲涿郡凡八郡
第九星主并州常以五申日候之甲申爲五原鴈門
丙申爲朔方雲中戊申爲西河庚申爲太原定襄壬
申爲上黨凡八郡瑛璣玉衡占色春青黃夏赤黃秋
白黃冬黑黃此是常明不如此者所向國有兵
殃起凡有六十郡九州所領自有分而名焉

三皇

邁化協神醇朴謂五星如連珠日月若合
璧化由自然民不犯慝至於書契之興五

帝是作軒轅始受河圖鬪苞授規日月星辰之象故星官之書自黃帝始至高陽氏使南正重司天北正黎司地唐虞之時羲

仲和仲

尚書曰帝在璇璣玉衡以齊七政孔安國曰在察也璣美玉也璣衡王者正天文之

器可運轉者七政日月五星各異政舜察天文齊七政也

夏有昆吾湯則巫

咸周之史佚萇弘宋之子韋楚之唐蔑魯

之梓慎鄭之裨竈魏石申夫

或云石申父

齊國

甘公皆掌天文之官仰占俯視以佐時政步變擿微通洞密至採禍福之原覩成敗

之勢秦燔詩書以愚百姓六經典籍殘爲
灰炭星官之書全而不毀故秦史書始皇
之時彗孛大角大角以亡有大星與小星
闕于宮中是其廢亡之徵至漢興景武之
際司馬談談子遷以世黎氏之後爲太史
令遷著史記作天官書成帝時中壘校尉
劉向廣洪範災條作五紀皇極之論以參
往行之事孝明帝使班固敘漢書而馬續
述天文志

謝沈書曰蔡邕撰建武已後星驗
著明以續前志譙周接繼其下者

今

後漢書志十
三
紹漢書作天文志起王莽居攝元年迄孝
獻帝建安二十五年二百一十五載言其
時星辰之變表象之應以顯天戒明王事

焉

臣昭以張衡天文之妙冠絕一代所著靈憲渾
儀略具辰耀之本今寫載以備其理焉靈憲曰

昔在先王將步天路用之靈軌尋緒本元先準之于
渾體是爲正儀立度而皇極有道建也樞運有道德稽
也乃建乃稽斯經天常聖人無心因茲以生心故靈
憲作興曰太素之前幽清玄靜寂寞冥默不可爲象
厥中惟虛厥外惟無如是者永久焉斯謂溟滓蓋乃
道之根也道根既建自無生有太素始萌萌而未兆
并氣同色渾沌不分故道志之言云有物渾成先天
地生其氣體固未可得而形其遲速固未可得而紀
也如是者又永久焉斯謂庀鴻蓋乃道之幹也道幹
既育有物成體於是元氣剖判剛柔始分清濁異位

天成於外地定於內天體於陽故圓以動地體於陰故平以靜動以行施靜以合化堙鬱構精時育庶類斯謂太元蓋乃道之實也在天成象在地成形天有九位地有九域天有三辰地有三形有象可效有形可度情性萬殊旁通感薄自然相生莫之能紀於是人之精者作聖實始紀綱而經緯之八極之維徑二億三萬二千三百里南北則短減千里東西則廣增千里自地至天半於八極則地之深亦如之通而度之則是渾已將覆其數用重鉤股懸天之景薄地之義皆移千里而差一寸得之過此而往者未之或知也未之或知者宇宙之謂也宇之表無極宙之端無窮天有兩儀以儻道中其可覩樞星是也謂之北極在南者不著故聖人弗之名焉其世之遂九分而減二陽道左迴故天運左行有驗於物則人氣左羸形左繚也天以陽迴地以陰淳是故天致其動稟氣舒光地致其靜承施候明天以順動不失其中則四序順至寒暑不減致生有節故品物用生地以靈靜作合承天清化致養四時而後育故品物用成凡至大

莫如天至厚莫若地地至質者曰地而已至多莫若
水水精爲漢漢用於天而無列焉思次質也地有山
嶽以宣其氣精種爲星星也者體生於地精成於天
列居錯峙各有道屬紫宮爲皇極之居太微爲五帝
之廷明堂之房大角有席天市有坐蒼龍連蜷於左
召虎猛據於右朱雀奮翼於前靈龜圈首於後黃神
軒轅於中六擾旣畜而狼蛇魚鼈罔有不具在野象
物在朝象官在人象事於是備矣懸象著明莫大乎
日月其徑當天周七百三十六分之一地廣二百四
十二分之一日者陽精之宗積而成鳥象鳥而有三
趾陽之類其數奇月者陰精之宗積而成獸象兔陰
之類其數耦其後有馮焉者拜請無死之藥於西王
母恒娥竊之以奔月將往枚筮之於有黃有黃占之
曰吉翩翩歸妹獨將西行逢天晦芒母驚母恐後且
大昌恒娥遂託身于月是爲蟾蜍夫日譬猶火月譬
猶水火則外光水則含景故月光生於日之所照魄
生於日之所蔽當日則光盈就日則光盡也衆星被
耀因水轉光當日之衝光常不合者蔽於他也是謂

闇虛在星星微月過則食日之薄地其明也繇暗視
明明無所屈是以望之若火方於中天天地同明繇
明瞻暗暗還自奪故望之若水火當夜而揚光在晝
則不明也月之於夜與日同而差微星則不然強弱
之差也衆星列布其以神著有五列焉是爲三十五
名一居中央謂之北斗動變挺占寔司王命四布於
方爲二十八宿日月運行歷示吉凶五緯經次用告
禍福則天心於是見矣中外之官常明者百有二十
四可名者三百二十爲星二千五百而海人之占未
存焉微星之數蓋萬一千五百二十庶物蠢蠢咸得
繫命不然何以揔而理諸夫三光同形有似珠玉神
守精存麗其職而宣其明及其衰神歇精斂於是乎
有隕星然則奔星之所墜至則石文曜麗乎天其動
者七日月五星是也周旋右回天道者貴順也近天
則遲遠天則速行則屈屈則留回留回則逆逆時遲
迫於天也行遲者覲于東覲于東屬陽行速者覲于
西覲于西屬陰日與月此配合也攝提熒惑地戾見
晨附于日也太白辰星見昏附于月也二陰三陽參

天兩地故男女取焉方星巡鎮必因常度苟或盈縮
不逾於次故有列司作使曰老子四星周伯王逢芮
各一錯乎五緯之間其見無期其行無度寔妖經星
之所然後吉凶宣周其祥可盡蔡邕表志曰言天體
者有三家一曰周髀二曰宣夜三曰渾天宣夜之學
絕無師法周髀數術具存考驗天狀多所違失故史
官不用唯渾天者近得其情今史官所用候臺銅儀
則其法也立八尺圓體之度而具天地之象以正黃
道以察發斂以行日月以步五緯精微深妙萬世不
易之道也官有其器而無本書前志亦闕而不論臣
求其舊文連年不得在東觀以治律未竟未及成書
案略求索竊不自量卒欲寢伏儀下思惟精意案度
成數扶以文義潤以道術著成篇章罪惡無狀投畀
有北灰滅雨絕世路無由宜博問羣臣下及巖穴知
渾天之意者使述其義以裨天文志撰建
武以來星變彗孛占驗著明者續其後

王莽地皇三年十一月有星孛于張東南

行五日不見孛星者惡氣所生爲亂兵

星占

曰其國內外用兵也

其所以孛德孛德者亂之象不明

之表又參然孛焉兵之類也故名之曰孛

孛之爲言猶有所傷害有所妨蔽或謂之

彗星所以除穢而布新也

宋均注鉤命決曰彗五彗也蒼則王

侯破矢子苦兵赤則賊起強國恣黃則女害色權奪

於后妃白則將軍逆二年兵大作黑則水精賦江河

決賊處處起也韓揚占曰其象若竹彗樹木條長短

無常其長大見久災深短小見不久災狹晏子春秋
曰齊景公睹彗星使伯常騫壤之晏子曰不可此天
教也日月之氣風雨不時彗星之出天爲民之亂見
之又一日景公彗星出而泣晏子問之公曰寡人聞
之彗星出其所向之國君當之今彗星出而向吾國

後漢書卷八
我的是以悲晏子曰君之行義固應無德於國穿開池
則欲其深以廣也爲臺榭則欲其高且大也賦斂如
搗奪誅戮如仇讎自是觀之李又將出彗星之出
庸何巨乎案如晏子之言李之與彗如似匪同 張

爲周地星李于張東南行即翼軫之分翼
軫爲楚是周楚地將有兵亂後一年正月
光武起兵舂陵會下江新市賊張卯王常
及更始之兵亦至俱攻破南陽斬莽前隊
大夫甄阜屬正梁丘賜等殺其士衆數萬
人更始爲天子都雒陽西入長安敗死光
武興於河北復都雒陽居周地除穢布新

之象

四年六月漢兵起南陽至昆陽莽使司徒
王尋司空王邑將諸郡兵號曰百萬衆已
至者四十二萬人能通兵法者六十三家
皆爲將帥持其圖書器械軍出關東牽從
群象虎狼猛獸放之道路以示富強用怖
山東至昆陽山作營百餘圍城數重或爲
衝車以撞城爲雲車高十丈以瞰城中弩
矢雨集城中負戶而汲求降不聽請出不

得二公之兵自以必克不恤軍事不協計
慮莽有覆敗之變見焉晝有雲氣如壞山
墮軍上軍人皆厭所謂營頭之星也占曰

營頭之所墮其下覆軍流血三千里

素山松書

曰怪星晝行名曰營頭行振大誅也

是時光武將兵數千人赴

救昆陽奔擊二公兵并力焱發號呼聲動
天地虎豹驚怖敗振會天大風飛屋瓦雨
如注水二公兵亂敗自相賊就死者數萬
人競赴湮水死者委積湮水爲之不流殺

司徒王尋軍皆散走歸本郡王邑還長安
莽敗俱誅死營頭之變覆軍流血之應也
四年秋太白在太微中燭地如月光太白
爲兵太微爲天廷太白羸而北入太微是
大兵將入天子廷也是時莽遣二公之兵
至昆陽已爲光武所破莽又拜九人爲將
軍皆以虎爲號九虎將軍至華陰皆爲漢
將鄧疊李松所破進攻京師倉將軍韓臣
至長門十月戊申漢兵自宣平城門入二

日已酉城中少年朱弟張魚等數千人起
兵攻莽燒作室斧斨法闔商人杜吳殺莽
漸臺之上校尉公賓就斬莽首大兵蹈藉
宮廷之中仍以更始入長安赤眉賊立劉
盆子爲天子皆以大兵入宮廷是其應也

光武

古今注曰建武六年九月丙戌月犯太微西
藩十一月辛亥月犯軒轅七年九月庚子土

入鬼中漢史鎮星逆行與鬼女主貴親有憂巫咸曰
有土功事是歲太白經太微八年四月辛未月犯房
第二星光芒不見九年正月乙卯金犯婁南星甲子
月犯軒轅第二星壬寅犯心大星七月戊辰月並犯
昴黃帝星占土犯鬼皇后有憂失亡其勢河圖月犯
房天子有憂四足之蟲多死漢史曰其國有憂

死又案嚴光傳光與帝卧足加帝腹上太史奏客星犯帝坐甚急 建武九年七

月乙丑金犯軒轅大星十一月乙丑金又

犯軒轅 孟康曰犯七寸以內光芒相及也韋昭曰自下往觸之曰犯 軒轅者

後宮之官大星爲皇后金犯之爲失勢是

時郭后已失勢見疏後廢爲中山太后陰

貴人立爲皇后十年三月癸卯流星如月

從太微出入北斗魁第六星色白旁有小

星射者十餘枚滅則有聲如雷食頃止 孟康

曰流星光跡相連也 流星爲貴使星大者使絕跡而去爲飛也

大星小者使小太微天子廷北斗魁主殺

星從太微出抵北斗魁是天子大使將出

有所伐殺

古今注曰正月壬戌月犯心後星閏月庚辰火入輿鬼過軫北庚申月在斗赤

如丹者也

十二月己亥大流星如缶出柳西南行

入軫且滅時分爲十餘如遺火狀須更有

聲隱隱如雷柳爲周軫爲秦蜀大流星出

柳入軫者是大使從周入蜀是時光武帝

使大司馬吳漢發南陽卒三萬人乘船泝

江而上擊蜀白帝公孫述

臣昭曰述雖以白承黃而此遂號爲

白帝於文繁
長書例未通

又命將軍馬武劉尚郭霸岑彭

馮駿平武都巴郡十二年十月漢進兵擊
述從弟衛尉永遂至廣都殺述女壻史興
威虜將軍馮駿拔江州斬述將田戎吳漢
又擊述大司馬謝豐斬首五千餘級臧宮
破涪殺述弟大司空恢十一月丁丑漢護
軍將軍高午刺述洞胷其夜死明日漢入
屠蜀城誅述大將公孫晃延岑等所殺數
萬人夷滅述妻宗族萬餘人以上是大將

出伐殺之應也其小星射者及如遺火分
爲十餘皆小將隨從之象有聲如雷隱隱
者兵將怒之徵也

十二年正月

古今注曰丁丑月乘軒轅大星

己未小星流百

枚以上或西北或正北或東北二夜止

古今

注曰二月辛亥月入
氐暈珥圍角亢房

六月戊戌晨小流星百

枚以上四面行小星者庶民之類流行者
移徙之象也或西北或東北或四面行皆
小民流移之徵是時西北討公孫述北征

盧芳匈奴助芳侵邊漢遣將軍馬武騎都尉劉納閭興軍下曲陽臨平呼沱以備胡匈奴入河東中國未安米穀荒貴民或流散後三年吳漢馬武又徙鴈門代郡上谷關西縣吏民六萬餘口置常關居庸關以東以避胡寇是小民流移之應

古今注曰其年七月丁丑

月犯昴頭兩星八月辛酉水見東方翼分九月甲午火犯輿鬼十月丁卯大星流有光發東井西行聲隆隆十三年二月乙卯火犯輿鬼西北黃帝占曰災惑守輿鬼大人憂一曰貴人當之巫咸曰水見翼多火災石氏曰爲旱鄰萌占曰流星出東井所之國大水

十五年正月丁未彗星見昴

炎長三丈韓揚占曰在昴大國

起兵也

稍西北行入營室犯離宮

韓揚占曰彗出營室東壁

之閒為兵起也

三月乙未至東壁滅見四十九日彗

星為兵入除穢昴為邊兵彗星出之為有

兵至十一月定襄都尉陰承反太守隨誅

之盧芳從匈奴入居高柳至十六年十月

降上璽綬一曰昴星為獄事是時大司徒

歐陽歆以事繫獄踰歲死營室天子之常

宮離宮妃后之所居彗星入營室犯離宮

是際宮室也是時郭皇后已疏至十七年十月遂廢爲中山太后立陰貴人爲皇后

除宮之象也

古今注曰十六年四月土星逆行十七年三月乙未火逆行從東門入太

微到執法星東已酉南出端門十八年十二月壬戌月犯木星十九年閏月戊申火逆從氐到亢二十一年七月辛酉月入畢二十三年三月癸未月食火星鄰萌曰熒惑逆行氐爲失火

三十年閏月甲午水在東井二十度生白氣東南指炎長五尺爲彗東北行至紫宮西藩止五月甲子不見凡見三十一日水常以夏至放於東井閏月在四月尚未當

見而見是嬴而進也東井爲水衡水出之
爲大水是歲五月及明年郡國大水壞城
郭傷禾稼殺人民白氣爲喪有災作彗彗
所以除穢紫宮天子之宮彗加其藩除宮
之象

荊州星經曰彗在東井國大人死七十日後
主當之五十日相當之三十日兵將當之

三年光武帝崩

三十一年七月

古今注曰戊申
月犯心後星

戊午火在輿

鬼一度入鬼中出尸星南半度十月己亥
犯軒轅大星又七日間有客星炎二尺所

西南行至明年二月二十二日在輿鬼東

北六尺所滅凡見百一十三日

輿鬼五星天府也黃帝占

曰輿鬼天目也朱雀頭也中央星如粉絮鬼為變害故言一名天尸斧鉞或以病亡或以誅斬火刻金天

以制法其西南一星主積布帛西北一星主積金玉東北一星主積馬東南一星主積兵一曰主領珠錢

郝萌曰輿鬼者參之尸也弧射狼謖中參左肩舉尸之東井治留尸輿鬼故曰天尸鬼之為言歸也又占

月五星有入輿鬼大臣誅有干鍼乘質者君貴人憂金玉用民人多疾從南入為男子從北入為女從西

入為老人從東入為丁壯棺木倍價熒惑為凶衰輿鬼尸星主

死亡熒惑入之為大喪軒轅為後宮七星

周地客星居之為死喪其後二年光武崩

中元

古今注曰元年三月甲寅月犯心後星

二年八月丁巳火

犯太微西南角星相去二寸十月戊子大
流星從西南東北行聲如雷火犯太微西
南角星爲將相後太尉趙熹司徒李訢坐
事免官大流星爲使中郎將竇固揚虛侯
馬武揚鄉侯王賞將兵征西也

後漢書志第十

後漢書志第十一

天文中

劉

昭

注補

明十二

章五

和三十三

殤一

安四十六

順二十三

質三

孝明永平元年四月丁酉流星大如斗起

天市樓西南行光照地流星爲外兵西南

行爲西南夷是時益州發兵擊姑復蠻夷

大牟替滅陵斬首傳詣雒陽

古今注曰閏九月辛未火在太

微左執法星所光芒相及十一月辛未土逆行乘東井北軒轅第二星二年十二月戊辰月食火星黃帝星經曰出入井爲人主一曰陽爵祿事

三年六月丁卯彗星出天船北長二尺所稍北行至亢南百三十五日去天船爲水彗出之爲大水是歲伊雒水溢到津城門壞伊橋郡七縣三十二皆大水

四年八月辛酉客星出梗河西北指貫索七十日去梗河爲胡兵至五年十一月北匈奴七千騎入五原塞十二月又入雲中

至原陽貫索貴人之牢其十二月陵鄉侯
梁松坐怨望懸飛書誹謗朝廷下獄死妻
子家屬徙九真

七年正月戊子流星大如杯從織女西行
光照地織女天之真女流星出之女主憂
其月癸卯光烈皇后崩

古今注曰三月庚戌
客星光氣二尺所在

太微左執法南端門
外凡見七十五日

八年六月壬午長星出柳張三十七度犯
軒轅刺天船陵太微氣至上階凡見五十

六日去柳周地是歲多雨水郡十四傷稼

古今注曰十二月
戊子客星出東方

九年正月戊申客星出牽牛長八尺歷建

星至房南

古今注曰歷斗建箕房
過角亢至翼芒東指

滅見至五

十日

郝萌占曰客星舍房左右羣
臣有吞藥死者又占有奪地

牽牛主吳

越房心爲宋後廣陵王荆與沈涼楚王英

與顏忠各謀逆事覺皆自殺廣陵屬吳彭

城古宋地

古今注曰十年七月甲寅月犯歲
星十一年六月壬辰火犯土星

十三年閏月丁亥火犯輿鬼爲大喪質星

爲大臣誅戮

晉灼曰鬼五星其中白者爲質

其十二月楚王

英與顏忠等造作妖謀反事覺英自殺忠

等皆伏誅

古今注曰十一月客星出軒轅四十八日十二月戊午月犯木星

十四年正月戊子客星出昴六十日在軒

轅右角稍滅昴主邊兵後一年漢遣奉車

都尉顯親侯竇固駙馬都尉耿秉騎都尉

耿忠開陽城門候秦彭太僕祭彤將兵擊

匈奴一曰軒轅右角爲貴相昴爲獄事客

星守之爲大獄是時考楚事未訖司徒虞

延與楚王英黨與黃初公孫弘等交通皆
自殺或下獄伏誅

十五年十一月乙丑太白入月中爲大將
戮人主亡不出三年後三年孝明帝崩

十六年正月丁丑歲星犯房右驂北第一

星不見辛巳乃見

石氏星經曰歲星守房良馬
出殿古今注曰正月丁未月

犯房房右驂爲貴臣歲星犯之爲見誅是後

司徒邢穆坐與阜陵王延交通知逆謀自

殺

四月癸未太白犯畢畢爲邊兵後北匈奴
寇入雲中至咸陽使者高弘發三郡兵追
討無所得太僕祭彤坐不進下獄

十八年六月己未彗星出張長三尺轉在
郎將南入太微皆屬張張周地爲東都太
微天子廷彗星犯之爲兵喪其八月壬子
孝明帝崩

孝章建初元年正月丁巳太白在昴西一
尺八月庚寅彗星出天市長二尺所稍行

入牽牛三度積四十日稍滅太白在昴爲
邊兵彗星出天市爲外軍牽牛爲吳越是
時蠻夷陳縱等及哀牢王類反攻蕉唐城
永昌太守王尋走奔牁榆安夷長宋延爲
羌所殺以武威太守傅育領護羌校尉馬
防行車騎將軍征西羌又阜陵王延與子
男魴謀反大逆無道得不誅廢爲侯

二月九日

古今注曰甲申金入斗魁

甲寅流星過紫宮中

長數丈散爲三滅十二月戊寅彗星出婁

三度長八九尺稍入紫宮中百六日稍滅
流星過入紫宮皆大人忌後四年六月癸

丑明德皇后崩

古今注曰五年二月戊辰木火俱在參五月戊寅木水在東井

六年七月丁酉夜有流星起軒轅大如拳歷文昌餘氣正白句曲西如文昌久久乃滅黃帝星經曰木守東井有土功之事一曰大水鄰萌曰歲星守參后當之熒惑守大人當之

元和元年四月丁巳客星晨出東方在胃
八度長三尺歷閣道入紫宮留四十日滅
閣道紫宮天子之宮也客星犯入留久爲
大喪後四年孝章帝崩

孝和永元元年正月辛卯有流星起參長

四丈

古今注曰大如拳起參東南

有光色黃白

古今注曰癸亥鎮在

參又有流星大如桃色赤起太微東蕃石氏曰鎮守參有土功事

二月流星起天

棊東北行三丈所滅色青白壬申夜有流

星起太微東蕃長三丈三月

古今注曰戊子土在參

丙

辰流星起天津

古今注曰星大如桃起天津東至斗黃白頻有光

壬戌

有流星起天將軍東北行

古今注曰色黃無光

參爲邊

兵天棊爲兵太微天廷天津爲水天將軍

爲兵流星起之皆爲兵其六月漢遣車騎

將軍竇憲執金吾耿秉與度遼將軍鄧鴻
出朔方並進兵臨私渠北鞬海斬虜首萬
餘級獲生口牛馬羊百萬頭日逐王等八
十一部降凡三十餘萬人追單于至西海
是歲七月又雨水漂人民是其應

古今注
曰十一

月壬申鎮星在東井石氏
曰天下水其大出流殺人

二年正月乙卯金木俱在奎丙寅水又在

奎

巫咸曰辰守奎多水火災亦
爲旱古今注曰土在東井

奎主武庫兵三

星會又爲兵喪辛未水金木在婁亦爲兵

又爲匿謀

郝萌曰辰守婁有兵兵罷兵起巫咸石氏云多火災古今注曰丙寅水在奎土

在東井金在婁木火在昴

二月丁酉有流星大如挑起紫宮東蕃西

北行五丈稍滅

古今注曰三月甲子火在亢南端門第一星南乙亥金在東井

四

月丙辰有流星大如瓜起文昌東北西南

行至少微西滅有頃音如雷聲已而金在

軒轅大星東北二尺所

古今注曰丁丑火在氐東南星東南

八

月丁未_有流星如雞子起太微西東南行

四丈所消十月癸未_有流星大如挑起天

津西行六丈所消十一月辛酉有流星大如拳起紫宮西行到胃消三年九月丁卯有流星大如雞子起紫宮西南至北斗柄

間消

星紫宮占曰有流星出紫宮天子使也色赤言兵色白言義色黃言吉色青言憂色黑言

水出皆以所之野命東西南北

紫宮天子宫文昌少微爲貴

臣天津爲水北斗主殺流星起歷紫宮文昌少微天津文昌爲天子使出有兵誅也竇憲爲大將軍憲弟篤景等皆卿校尉憲女弟壻郭舉爲侍中射聲校尉與衛尉鄧

疊母元俱出入宮中謀爲不軌至四年六月丙寅發覺和帝幸北宮詔執金吾五校勒兵屯南北宮閉城門捕舉舉父長樂少府璜及疊疊弟步兵校尉磊母元皆下獄誅憲弟篤景等皆自殺金犯軒輊女主失勢竇氏被誅太后失勢

五年

古今注曰正月甲戌月乘歲星

四月癸巳太白熒惑辰

星俱在東井

巫咸曰太白守井五穀不成黃帝經曰五星及客星守井皆爲水石

氏曰爲旱又曰太白入東井留一日以上乃占大臣當之期三月若一年遠五年古今注曰木在輿鬼

七月壬午歲星犯軒轅大星九月金在南

斗魁中

爲水石氏
曰爲旱

火犯房北第一星東井秦

地爲法三星合内外有兵又爲法令及水

金入斗口中爲大將將死火犯房北第一

星爲將相其六年正月司徒丁鴻薨

古今注曰

六年六月丁亥金在東井閏月己丑流星大如桃起參北西至參肩南稍有光

七月水大

漂殺人民傷五穀許侯馬光有罪自殺九

月行車騎將軍事鄧鴻越騎校尉馮柱發

左右羽林北軍五校士及八郡跡射烏桓

鮮卑合四萬騎與度遼將軍朱徵護烏桓
校尉任尚中郎將杜崇征叛胡十二月車
騎將軍鴻坐追虜失利下獄死度遼將軍
徵中郎將崇皆抵罪

七年正月丁未有流星起天津入紫宮中

滅色青黃有光二月癸酉金火俱在參

咸巫

占曰熒惑守參多火災海中占曰為旱太白守參國有反臣 郗萌曰有攻戰伐國也 戊寅金

火俱在東井 郗萌曰熒惑守井百川皆滿太白又從舍蓋二十日流國又曰雜糴貴又

將相死 八月甲寅水土金俱在軫 春秋緯曰五星有入軫者皆為

兵大起巫咸占曰五星入軫者司其出日而數之期
二十日皆爲兵發司始入處之率一日期十日軍罷
石氏星經曰辰星守軫歲水郗萌曰鎮星出入留舍
軫六十日不下必有大喪春秋緯曰太白入軫兵大
起郗萌曰太白十一月甲戌金火俱在心雜書

曰太白守心
後九年大飢

十二月己卯有流星起文昌入

紫宮消丙辰火金水俱在斗流星入紫宮

金火在心皆爲大喪三星合軫爲白衣之

會金火俱在參東井皆爲外兵有死將三

星俱在斗有戮將若有死相八年四月樂

成王黨七月樂成王宗皆薨將兵長史吳

後漢書卷十一
樊坐事徵下獄誅

古今注曰八年九月辛丑夜有流星大如拳起婁

十

月北海王威自殺十二月陳王羨薨其九

年閏月皇太后竇氏崩遼東鮮卑太守祭

參不追虜徵下獄誅九月司徒劉方坐事

免官自殺隴西羌反遣執金吾劉尚行征

西將軍事越騎校尉節鄉侯趙世發北軍

五校黎陽雍營及邊胡兵三萬騎征西羌

十一年五月丙午流星大如瓜起氏西南

行稍有光白色

古今注曰六月庚辰月入畢中

占曰流星白

爲有使客大爲大使小亦小使疾期疾遲
亦遲大如瓜爲近小行稍有光爲遲也又
正王日邊方有受王命者也明年二月蜀
郡旄牛徼外夷白狼樓薄種王唐縉等率
種人口十七萬歸義內屬賜金印紫綬錢
帛

十二年十一月癸酉夜有蒼白氣長三丈
起天園東北指軍市見積十日占曰兵起
十日期歲明年十一月遼東鮮卑二千餘

騎寇右北平

十三年

古今注曰正月辛未水乘輿鬼十二月癸巳犯軒轅大星

十一月乙

丑軒轅第四星間有小客星色青黃軒轅

爲後宮星出之爲失勢其十四年六月辛

卯陰皇后廢

古今注曰十四年正月乙卯月犯軒轅在太微中二月十日丁酉水

入太微西門十一月丁丑有流星大如拳起北斗魁中北至閣道稍有光色赤黃須臾西北有雷聲

十六年四月丁未紫宮中生白氣如粉絮

戊午客星出紫宮西行至昴五月壬申滅

七月庚午水在輿鬼中

黃帝占曰辰星犯鬼大臣誅國有憂鄰萌

曰多
蝗蟲

十月辛亥流星起鉤陳北行三丈有
光色黃白氣生紫宮中爲喪客星從紫宮
西行至昴爲趙興鬼爲死喪鉤陳爲皇后
流星出之爲中使後一年元興元年十月
二日和帝崩殤帝即位一年又崩無嗣鄧
太后遣使者迎清河孝王子即位是爲孝
安皇帝是其應也清河趙地也

元興元年二月庚辰有流星起角亢五丈
所四月辛亥有流星起斗東北行到須女

七月己巳有流星起天市五丈所光色赤

閏月辛亥水金俱在氐

巫咸曰辰星守氐多水災海中占曰天下

大旱所在不收荊州星占太白守氐國君大哭

流星起斗東北行至須

女須女燕地天市爲外軍水金會爲兵誅其年遼東貊人反鈔六縣發上谷漁陽右北平遼西烏桓討之

孝殤帝延平元年正月丁酉金火在婁金

火合爲爍爲大人憂

古今注曰七月甲申月在南斗中

是歲

八月辛亥孝殤帝崩

孝安永初元年五月戊寅熒惑逆行守心

前星

韓揚占曰多火災一曰地震檢其年十八郡地震明年漢陽火

八月戊申

客星在東井弧星西南心為天子明堂熒

惑逆行守之為反臣

雜書曰熒惑守心逆臣起黃帝占曰逆行守心二十

日大目亂

客星在東井為大水

荊州經曰客星干犯東井則大目誅

是時安帝未臨朝鄧太后攝政鄧騭為車

騎將軍弟弘惺閭皆以校尉封侯秉國勢

司空周章意不平與王尊叔元茂等謀欲

閉宮門捕將軍兄弟誅常侍鄭眾蔡倫刦

刺尚書廢皇太后封皇帝為遠國王事覺
章自殺東井弧皆秦地是時羌反斷隴道
漢遣隲將左右羽林北軍五校及諸郡兵
征之是歲郡國四十一縣三百一十五兩
水四瀆溢傷秋稼壞城郭殺人民是其應
也

二年正月戊子太白晝見

古今注曰四月乙亥月入南斗魁中

八月己亥熒惑
出入太微端門

三年正月庚戌月犯心後星

河圖曰亂
臣在旁

已亥太白入斗中

古今注曰三月壬寅熒惑入輿鬼中

五月丙寅太白入畢中石氏經曰太白守畢國多任刑也

十二月彗星起天

苑南東北指長六七尺色蒼白太白晝見

爲強臣

前志曰太白晝見強國弱小國強女主昌

是時鄧氏方盛

月犯心後星不利子心爲宋五月丁酉沛

王牙薨太白入斗中爲貴相凶

臣昭案楊厚對曰以爲諸

王子多在京師容有非常宜亟發遣還本國太后從之星尋滅不見以斯而言太白入之災在貴相

天

苑爲外軍彗星出其南爲外兵是後使羌

氏討賊李貴又使烏桓擊鮮卑又使中郎

將任尚護羌校尉馬賢擊羌皆降

四年

古今注曰二月丙寅月犯軒轅大星

六月甲子客星大如

李蒼白芒氣長二尺西南指上階星癸酉

太白入輿鬼指上階為三公後太尉張敏

免官太白入輿鬼為將凶後中郎將任尚

坐賊千萬檻車徵棄市

韓楊占曰太白入輿鬼亂臣在內臣昭以

占為明豈任尚所能感也

五年六月辛丑太白晝見經天

春秋漢舍孽曰陽弱辰逆

太白經天注云陽弱君柔不堪鉤命決曰天失仁太白經天

元初元年三月

癸酉熒惑入輿鬼二年九月辛酉熒惑入

輿鬼中三年三月熒惑入輿鬼中五月丙

寅太白入畢口

黃帝占曰大攻近期十五日遠期四十日又曰大臣當之亂國易主

七月甲寅歲星入輿鬼閏月己未太白犯

太微左執法十一月甲午客星見西方己

亥在虛危南至胃昂

郝萌曰客星入虛大人當之又曰客星守危強

臣執國命在后族又且大風有危敗黃帝星經曰客星入守若出危大飢民食貴

四年正

月丙戌歲星留輿鬼中

石氏經曰歲星入留輿鬼五十日不下民有大

喪百日不下民半死黃帝經曰守鬼十日金錢散諸侯郝萌曰五穀多傷民以飢死者無數

乙未

太白晝見丙上四月壬戌太白入輿鬼中

石氏占太白入鬼一曰病在女主一曰將戮死己巳辰星入輿鬼中郝

曰以罪誅大臣一曰五月己卯辰星犯歲星六后疾一曰大人憂

月丙申熒惑入輿鬼中戊戌犯輿鬼大星

九月辛巳太白入南斗口中黃帝經曰大人當之國易政

五年三月丙申鎮星犯東井鉞星五月庚

午辰星犯輿鬼質星丙戌太白犯鉞星六

年四月癸丑太白入輿鬼郝萌曰太白守六輿鬼疾在女主

月丙戌熒惑在輿鬼中黃帝經曰熒惑犯守鬼國有大喪有女喪

大將有死者荆州星占曰熒惑丁卯鎮星在輿犯鬼忠臣戮死不出一年中

鬼中

黃帝經曰鎮入鬼中大臣誅海中石氏曰大人憂

辛巳太白犯左

執法自永初五年到永寧七年之中太白
一晝見經天再入輿鬼一守畢再犯左執
法入南斗犯鉞星熒惑五入輿鬼鎮星一
犯東井鉞星一入輿鬼歲星辰星再入輿
鬼凡五星入輿鬼中皆爲死喪熒惑太白
甚犯鉞質星爲誅戮斗爲貴將執法爲近
臣客星在虛危爲喪爲哭泣

星占曰不一
年遠期二年

昂

畢爲邊兵又爲獄事至建光元年三月癸

已鄧太后崩五月庚辰太后兄車騎將軍
騭等七侯皆免官自殺是其應也

延光

古今注曰元年四月丙午太白晝見

二年八月己亥熒惑

出太微端門三年二月辛未太白犯昴

石氏

星占太白守昴兵從門闕入主人走郝萌曰不有亡國必有謀主又云入昴大赦

五月癸

丑太白入畢

郝萌曰太白入畢口馬馳人走又曰有中喪

九月壬寅

鎮星犯左執法四年太白入輿鬼中

古今注曰

四月甲辰入

六月壬辰太白出太微九月甲子太

白入斗口中十一月客星見天市熒惑出

太微爲亂臣太白犯昴畢爲近兵一曰大
人當之鎮星犯左執法有誅臣太白入輿
鬼中爲大喪太白出太微爲中宮有兵入
斗口爲貴將相有誅者客星見天市中爲
貴喪是時大將軍耿寶中常侍江京樊豐
小黃門劉安與阿母王聖聖子女永等并
構譖太子保并惡太子乳母男廚監邴吉
三年九月丁酉廢太子爲濟陰王以北鄉
侯懿代殺男吉徙其父母妻子日南四年

三月丁卯安帝巡狩從南陽還道寢疾至葉崩閭后與兄衛尉顯中常侍江京等共隱匿不令羣臣知上崩遣司徒劉喜等分詣郊廟告天請命載入北宮庚午夕發喪尊閭氏爲太后北鄉侯懿病薨京等又不欲立保白太后更徵諸王子擇所立中黃門孫程王國王康等十九人共合謀誅顯京等立保爲天子是爲孝順皇帝皆姦人強臣狂亂王室其於死亡誅戮兵起宮中

是其應

古今注曰永建元年二月甲午客星入太微五月甲子月入斗李氏家書曰時

天有變氣李郃上書諫曰臣聞天不言縣象以示吉凶挺災變異以爲譴誡昔齊桓公遭虹貫牛斗之變納管仲之謀令齊去婦無近妃宮桓公聽用齊以大安趙有尹史見月生齒齟畢大星占有兵變趙君曰天下共一畢知爲何國也下史於獄其後公子牙謀弑君血書端門如史所言乃月十三日有客星氣象彗孛歷天市梗河招搖槍棊十六日入紫宮迫北辰十七日復過文昌泰陵至天船積水間稍微不見客星一占曰魯星歷天市者爲穀貴梗河三星備非常泰陵八星爲凶喪紫宮北辰爲至尊如占恐宮廬之內有兵喪之變千里之外有非常暴逆之憂魯星不得過歷尊宿行度從疾應非一端恐復有如王阿母阿母子賤妾之欲居帝旁耗亂政事者誠今有之宜當抑遠饒足以財王者權柄及爵祿人天所重慎誠非阿妾所宜干豫矢故挺變明以示人如不承愼禍至變成悔之靡及也

孝順永建二年二月癸未太白晝見三十

九日

古今注曰丁巳月犯心七月丁酉犯昴

閏月乙酉太白晝

見東南維四十一日八月乙巳熒惑入輿

鬼太白晝見爲強臣熒惑爲凶輿鬼爲死

喪質星爲誅戮是時中常侍高梵張防將

作大匠翟酺尚書令高堂芝僕射張敦尚

書尹就郎姜述楊鳳等及兗州刺史鮑就

使匈奴中郎張國金城太守張篤敦煌太

守張朗相與交通漏泄就述棄市梵防酺

芝敦鳳就國皆抵罪又定遠侯班始尚陰

城公主堅得鬪爭殺堅得坐要斬馬市同

產皆棄市

古今注曰其年九月戊寅有白氣廣三尺長十餘丈從北落師門南至斗三年

二月癸未月犯心後星六月甲子太白晝見四年二月癸丑月犯心後星五年閏月庚子太白晝見六年

彗星出於斗牽牛滅於虛危虛危爲齊牽牛吳越故海賊浮於會稽山賊捷於濟南五年夏熒惑守氐諸

侯有斬者是冬班始鬻斬馬市

六年四月熒惑入太微中犯左右執法西

北方六寸所十月乙卯太白晝見十二月

壬申客星芒氣長二尺餘西南指色蒼白

在牽牛六度客星芒氣白爲兵牽牛爲吳
越後一年會稽海賊曾於等千餘人燒句
章殺長吏又殺鄞鄮長取官兵拘殺吏民
攻東部都尉揚州六郡逆賊章何等稱將
軍犯四十九縣大攻略吏民

陽嘉元年閏月戊子

臣昭案郎顗表云十七日巳丑

客星氣

白廣二尺長五丈起天苑西南主馬牛爲
外軍色白爲兵是時敦煌太守徐白使疏
勒王盤等兵二萬人入于寘界虜掠斬首

三百餘級烏桓校尉耿畢使烏桓親漢都尉戎末槐等出塞鈔鮮卑斬首獲生口財物鮮卑怨恨鈔遼東代郡殺傷吏民是後西戎北狄爲寇害以馬牛起兵馬牛亦死傷於兵中至十餘年乃息

臣昭案郎顗傳陽嘉元年太白與歲

星合於房心二年熒惑失度盈縮往來涉歷與鬼環繞軒轅古今注曰二年四月壬寅太白晝見五月癸巳又晝見十一月辛未又晝見十二月壬寅月犯太白三年十二月辛未太白晝見四月乙卯太白熒惑入輿鬼永和元年正月丁卯太白犯牽牛大星

永和二年五月戊申太白晝見八月庚子

熒惑犯南斗斗爲吳

黃帝經曰不暮年國有亂有憂海中占爲多火

災一曰旱古今注曰九月壬午月入畢口中

明年五月吳郡太守行

丞事羊珍與越兵弟葉吏民吳銅等二百餘人起兵反殺吏民燒官亭民舍攻太守府太守王衡距守吏兵格殺珍等又江賊蔡伯流等數百人攻廣陵九江燒城郭殺都長

三年二月辛巳太白晝見戊子在熒惑西南光芒相犯辛丑有流星大如斗從西北

東行長八九尺色赤黃有聲隆隆如雷三月壬子太白晝見六月丙午太白晝見八月

月

古今注曰巳酉熒惑入太微

乙卯太白晝見閏月甲

寅辰星入輿鬼巳酉熒惑入太微乙卯太

白晝見

古今注曰十二月丁卯月犯軒轅大星

太白者將軍之

官又爲西州晝見陰盛與君爭明熒惑與太白相犯爲兵喪流星爲使聲隆隆怒之象也辰星入輿鬼爲大臣有死者熒惑入太微亂臣在廷中是時大將軍梁商父子

秉勢故太白常晝見也其四年正月祀南
郊夕牲中常侍張逵遽政陽定內者令石
光尚方令傅福等與中常侍曹騰孟賁爭
權白帝言騰賁與商謀反矯詔命收騰賁
賁自解說順帝寤解騰賁縛逵等自知事
不從各奔走或自刺解貂蟬投草中逃亡
皆得免其六年征西將軍馬賢擊西羌於
北地謝姑山下父子爲羌所沒殺是其應
也

四年七月壬午熒惑入南斗犯第三星五年四月戊午太白晝見八月己酉熒惑入太微斗爲貴相爲揚州熒惑犯入之爲兵喪其六年大將軍商薨九江丹陽賊周生馬勉等起兵攻沒郡縣梁氏又專權於天廷中

六年二月丁巳彗星見東方長六七尺色

青白西南指營室及墳墓星

郝萌占曰彗星出而中營

室天下亂易政以五色占之吉凶

丁丑彗星在奎一度長六

尺癸未昏見

河圖曰彗星出貫奎庫兵悉出禍在強侯外夷胡應逆首謀也

西

北歷昴畢甲申在東井遂歷輿鬼柳七星

張光炎及三台至軒轅中滅

古今注曰五月庚寅太白晝見

十一月甲午太白晝見

營室者天子常宮墳墓主死彗

星起而在營室墳墓不出五年天下有大

喪後四年孝順帝崩昴爲邊兵又爲趙羌

周馬父子後遂爲寇又劉文刦清河相射

暁欲立王蒜爲天子暁不聽殺暁王閉門

距文官兵捕誅文蒜以惡人所刦廢爲尉

氏侯又徙爲犍陽都鄉侯薨國絕歷東井
輿鬼爲秦皆羌所攻鈔炎及三台爲三公
是時太尉杜喬及故太尉李固爲梁冀所
陷入坐文書死及至注張爲周滅於軒轅
中爲後宮其後懿獻后以憂死梁氏被誅
是其應也

漢安

古今注曰元年二月壬午歲星在太微中八月癸丑月犯南斗入魁中

二年

正月己亥太白晝見五月丁亥辰星犯輿

鬼

古今注曰丙辰月入斗中

六月乙丑熒惑光芒犯鎮星

七月甲申太白晝見辰星犯輿鬼爲大喪
熒惑犯鎮星爲大人忌明年八月孝順帝
崩孝冲古今注曰建康元年九月己亥太白晝見
韓揚占曰天下有喪一曰有白衣之會
明年正月又崩

孝質本初元年

古今注曰三月
丁丑月入南斗

三月癸丑熒

惑入輿鬼四月辛巳太白入輿鬼皆爲大
喪五月庚戌太白犯熒惑爲逆謀閏月一
日孝質帝爲梁冀所鳩崩

後漢書志第十一

後漢書志第十二

天文下

劉昭

注補

栢三十八

靈二十

獻九

隕石

孝栢建和元年八月壬寅熒惑犯輿鬼質
星二年二月辛卯熒惑行在輿鬼中三年
五月己丑太白行入太微右掖門留十五
日出端門丙申熒惑入東井八月己亥鎮
星犯輿鬼中南星乙丑彗星芒長五尺見

天市中東南指色黃白九月戊辰不見熒惑犯輿鬼爲死喪質星爲戮臣入太微爲亂臣鎮星犯輿鬼爲喪彗星見天市中爲質貴人至和平元年十二月甲寅梁太后崩梁冀益驕亂矣

元嘉元年二月戊子太白晝見永興二年閏月丁酉太白晝見時上幸後宮采女鄧猛明年封猛兄演爲南頓侯後四歲梁皇后崩梁冀被誅猛立爲皇后恩寵甚盛

永壽元年三月丙申鎮星逆行入太微中
七十四日去左掖門七月己未辰星入太
微中八十日去左掖門八月己巳熒惑入
太微二十一日出端門太微天子廷也鎮
星爲貴臣妃后逆行爲匿謀辰星入太微
爲大水一曰後宮有憂是歲雒水溢至津
門南陽大水熒惑留入太微中又爲亂臣
是時梁氏專政

九月己酉晝有流星長二尺所色黃白癸

已熒惑犯歲星爲姦臣謀大將戮

二年六月甲寅辰星入太微遂伏不見辰
星爲水爲兵爲妃后八月戊午太白犯軒
轅大星爲皇后其三年四月戊寅熒惑入
東井口中爲大臣有誅者其七月丁丑太
白犯心前星爲大臣後二年四月懿獻皇
后以憂死大將軍梁冀使太倉令秦宮刺
殺議郎邴尊又欲殺鄧后母宣事覺桓帝
收冀及妻壽襄城君印綬皆自殺誅諸梁

及孫氏宗族或徙邊是其應也

延熹四年三月甲寅熒惑犯輿鬼質星五月辛酉客星在營室稍順行生芒長五尺所至心一度轉爲彗熒惑犯輿鬼質星大臣有戮死者五年十月南郡太守李肅坐蠻夷賊攻盜郡縣取財物一億以上入府取銅虎符肅背敵走不救城郭又監黎陽謁者燕喬坐賊重泉令彭良殺無辜皆棄市京兆虎牙都尉宋謙坐賊下獄死客星

後漢書卷三十三
在營室至心作彗爲大喪後四年鄧后以
憂死

六年十一月丁亥太白晝見是時鄧后家
貴盛七年七月戊辰辰星犯歲星八月庚
戌熒惑犯輿鬼質星庚申歲星犯軒轅大
星十月丙辰太白犯房北星丁卯辰星犯
太白十二月乙丑熒惑犯軒轅第二星辰
星犯歲星爲兵熒惑犯質星有戮臣歲星
犯軒轅爲女主憂太白犯房北星爲後宮

其八年二月太僕南鄉侯左勝以罪賜死
勝弟中常侍上蔡侯惲北鄉侯黨皆自殺
癸亥皇后鄧氏坐執左道廢遷于祠宮死
宗親侍中泚陽侯鄧康河南尹鄧萬越騎
校尉鄧弼虎賁中郎將安鄉侯鄧魯侍中
監羽林左騎鄧德右騎鄧壽昆陽侯鄧統
涑陽侯鄧秉議郎鄧循皆繫暴室萬魯死
康等免官又荊州刺史芝交阯刺史葛祗
皆爲賊所拘略桂陽太守任胤背敵走皆

弃市熒惑犯輿鬼質星之應也

八年五月癸酉太白犯輿鬼質星壬午熒惑入太微右執法閏月己未太白犯心前星十月癸酉歲星犯左執法十一月戊午歲星入太微犯左執法九年正月壬辰歲星入太微中五十八日出端門六月壬戌太白行入輿鬼七月乙未熒惑行輿鬼中犯質星九月辛亥熒惑入太微西門積五十八日永康元年正月庚寅熒惑逆行入

太微東門留太微中百一日出端門七月
丙戌太白晝見經天太白犯心前星太白
犯輿鬼質星有戮臣熒惑入太微爲賊臣
太白犯心前星爲兵喪歲星入太微犯左
執法將相有誅者歲星入守太微五十日
占爲人主太白熒惑入輿鬼皆爲死喪又
犯質星爲戮臣熒惑留太微中百一日占
爲人主太白晝見經天爲兵憂在大人其
九年十一月太原太守劉瓚南陽太守成

璿皆坐殺無辜荊州刺史李隗爲賊所拘
尚書郎孟璫坐受金漏言皆弃市永康元
年十二月丁丑相帝崩太傅陳蕃大將軍
竇武尚書令尹勲黃門令山冰等皆枉死
太白犯心熒惑留守太微之應也

孝靈帝建寧元年六月太白在西方入太
微犯西蕃南頭星太微天廷也太白行其
中宮門當閉大將被甲兵大臣伏誅其八
月太傅陳蕃大將軍竇武謀欲盡誅諸官

者其九月辛亥中常侍曹節長樂五官史
朱瑀覺之矯制殺蕃武等家屬徙日南比
景

熹平元年十月熒惑入南斗中占曰熒惑
所守爲兵亂斗爲吳其十一月會稽賊許
昭聚衆自稱大將軍昭父生爲越王攻破
郡縣

二年四月有星出文昌入紫宮蛇行有首
尾無身赤色有光炤垣牆八月丙寅太白

犯心前星辛未白氣如一匹練衝北斗第四星占曰文昌爲上將貴相太白犯心前星爲大臣後六年司徒劉羣爲中常侍曹節所譖下獄死白氣衝北斗爲大戰明年冬揚州刺史臧旻丹陽太守陳寅攻盜賊苴康斬首數千級

光和元年四月癸丑流星犯軒轅第二星東北行入北斗魁中八月彗星出亢北入天市中長數尺稍長至五六丈赤色經歷

十餘宿八十餘日乃消於天苑中流星爲
貴使軒轅爲內宮北斗魁主殺流星從軒
轅出抵北斗魁是天子大使將出有伐殺
也至中平元年黃巾賊起上遣中郎將皇
甫嵩朱雋等征之斬首十餘萬級彗除天
市天帝將徙帝將易都至初平元年獻帝
遷都長安

三年冬彗星出狼弧東行至于張乃去張
爲周地彗星犯之爲兵亂後四年京都大

後漢書卷十二
發兵擊黃巾賊

五年四月熒惑在太微中守屏七月彗星
出三台下東行入太微至太子幸臣二十
餘日而消十月歲星熒惑太白三合於虛
相去各五六寸如連珠占曰熒惑在太微
爲亂臣是時中常侍趙忠張讓郭勝孫璋
等並爲姦亂彗星入太微天下易主至中
平六年宮車晏駕歲星熒惑太白三合於
虛爲喪虛齊也明年琅邪王據薨

光 and 中國皇星東南角去地一二丈如炬
火狀十餘日不見占曰國皇星爲內亂外
內有兵喪其後黃巾賊張角燒州郡朝廷
遣將討平斬首十餘萬級中平六年宮車
晏駕大將軍何進令司隸校尉袁紹私募
兵千餘人陰踣雒陽城外竊呼并州牧董卓
使將兵至京都共誅中官對戰南北宮
闕下死者數千人燔燒宮室遷都西京及
司徒王允與將軍呂布誅卓卓部曲將郭

汜李傕旋兵攻長安公卿百官吏民戰死者且萬人天下之亂皆自內發

中平二年十月癸亥客星出南門中大如半筵五色喜怒稍小至後年六月消占曰爲兵至六年司隸校尉袁紹誅滅中官大將軍部曲將吳匡攻殺車騎將軍何苗死者數千人

三年四月熒惑逆行守心後星十月戊午月食心後星占曰爲大喪後三年而靈帝

崩

五年二月彗星出奎逆行入紫宮後三出六十餘日乃消六月丁卯客星如三升椀出貫索西南行入天市至尾而消占曰彗除紫宮天下易主客星入天市爲貴人喪明年四月宮車晏駕中平中夏流星赤如火長三丈起河鼓入天市抵觸宦者星色白長二三丈後尾再屈食頃乃滅狀似枉矢占曰枉矢流發其宮射所謂矢當直而

枉者操矢者邪枉人也中平六年大將軍
何進謀盡誅中官於省中殺進俱兩破滅
天下由此遂大壞亂

六年八月丙寅太白犯心前星戊辰犯心
中大星其日未冥四刻大將軍何進於省
中爲諸黃門所殺己巳車騎將軍何苗爲
進部曲將吳匡所殺

孝獻初平三年九月蚩尤旗見長十餘丈
色白出角亢之南占曰蚩尤旗見則王征

伐四方其後丞相曹公征討天下且三十
年

四年十月孛星出兩角間東北行入天市
中而滅占曰彗除天市天帝將徙帝將易
都是時上在長安後二年東遷明年七月
至雒陽其八月曹公迎上都許

建安五年十月辛亥有星孛于大梁冀州
分也時袁紹在冀州其年十一月紹軍爲
曹公所破七年夏紹死後曹公遂取冀州

九年十一月有星孛于東井輿鬼入軒轅
太微十一年正月星孛于北斗首在斗中
尾貫紫宮及北辰占曰彗星掃太微宮人
主易位其後魏文帝受禪

十二年十月辛卯有星孛于鶉尾荊州分
也時荊州牧劉表據荊州時益州從事周
羣以荊州牧將死而失土明年秋表卒以
小子琮自代曹公將伐荊州琮懼舉軍詣
公降

十七年十二月有星孛于五諸侯周羣以爲西方專據土地者皆將失土是時益州牧劉璋據益州漢中太守張魯別據漢中韓遂據涼州宋建別據枹罕明年冬曹公遣偏將擊涼州十九年獲宋建韓遂逃于羌中病死其年秋璋失益州二十年秋公攻漢中魯降

十八年秋歲星鎮星熒惑俱入太微逆行留守帝坐百餘日占曰歲星入太微人主

改

二十三年三月孛星晨見東方二十餘日
夕出西方犯歷五車東井五諸侯文昌軒
轅后妃太微鋒炎指帝坐占曰除舊布新
之象也

殤帝延平元年九月乙亥隕石陳留四春
秋僖公十六年隕石于宋五傳曰隕星也
董仲舒以爲從高反下之象或以爲庶人
惟星隕民困之象也

桓帝延熹七年三月癸亥隕石右扶風一
鄠又隕石二皆有聲如雷

後漢書志第十二

後漢書志卷第十三

五行一

劉昭

注補

貌不恭

淫雨

服妖

雞禍

青眚

屋自壞

訛言

旱

謠

狼食人

五行傳說及其占應漢書五行志錄之詳

矣故泰山太守應劭給事中董巴散騎常

侍譙周

蜀志曰周字允南巴西西充國人也治尚書兼通諸經及圖緯州郡辟請皆不應耽

古篤學誦讀典籍欣然獨笑
以忘寢食蜀亡魏徵不至

並撰建武以來災

異今合而論之以續前志云

五行傳曰田獵不宿

鄭玄注尚書大傳曰不宿不宿禽也角主天兵

周禮四時習兵因以田獵禮志曰天子不合圍諸侯不掩羣過此則暴天物為不宿禽角南有天庫將軍

騎官漢書音義曰遊田馳騁不反宮室

飲食不享

鄭玄曰享獻也禮志曰天子諸

侯無事則歲三田一為乾豆二為賓客三為充君之庖周禮獸人冬獻狼夏獻麋春秋獻獸物此獻禮之

大略也注五行稱鄭玄曰皆出注大傳也漢書音義曰無獻享之禮

出入不節

鄭玄曰角

為天門房有三道出入之象也

奪民農時

鄭玄曰房心農時之候也季冬之月命農

師計耦耕事是時房心晨中春秋傳曰辰為農祥后稷之所經緯也

及有茲謀

鄭玄

曰亢為朝廷房心為明堂謀事出政之象則木不曲直鄭玄曰君行此五者為逆

天東宮之政東宮於地為木木性或曲或直人所用為器也無故生不暢茂多折槁是為木不曲直木金

水火土謂之五材春秋傳曰天生五材民並用之其政逆則神怒神怒則材失性不為民用其他變異皆

屬沴沴亦神怒凡神怒者日月五星既見適于天矣洪範木曰曲直孔安國曰木可以揉曲直謂木

失其性而為災也又曰貌之不恭是謂不

肅鄭玄曰肅敬也君貌不恭則是厥咎狂鄭玄曰君

臣不敬則倨慢如狂方儲對策曰厥罰恒雨鄭玄曰貌

君失制度下不恭承臣恣淫慢曰木木主春春氣生生氣失則踰其節故常雨也管

子曰冬作土功發地藏則夏多暴雨秋雨霖不止淮
南子曰金不厥極惡孔安國曰醜陋時則有服妖鄭玄

收則多淫雨

曰服貌
之飾也

時則有龜孽

鄭玄曰龜蟲之生於水而游於春者屬木

時

則有雞禍

鄭玄曰雞畜之有冠翼者也屬貌洪範傳曰妖者敗胎也少小之類言其事之

尚微也至孽則牙孽也至乎禍則著矣

時則有下體生上之病

鄭玄曰痾病也貌氣失之病也漢書音義曰若梁孝王之時牛足反出背上也此下欲伐上之禍

時

則有青眚青祥

鄭玄曰青木色也眚生於此祥自外來也

惟金沴

木

鄭玄曰沴殄也凡貌言視聽思心一事失則逆人之心人心逆則怨木金水火土氣為之傷傷

則衝勝來乘殄之於是神怒人怨將為禍亂故五行先見變異以譴告人也及妖孽禍病眚祥皆其氣類

暴作非常為時怪者也各以物象為之占也

說云氣之相傷謂之沴

尚書大傳曰凡六沴之作歲之朝月之朝日之朝則后王受之歲之中月之中日之中則正卿受之歲之

夕月之夕日之夕則庶民受之鄭玄曰自正月盡四月爲歲之朝自五月盡八月爲歲之中自九月盡十二月爲歲之夕上旬爲月之朝中旬爲月之中下旬爲月之夕平旦至食時爲日之朝隅中至日跌爲日之中晡時至黃昏爲日之夕受之受其凶咎也大傳又云其二辰以次相將其次受之鄭玄曰二辰謂日月也假令歲之朝也日月中則上公受之日月夕則下公受之歲之中也日月朝則孤卿受之日月夕則大夫受之歲之夕也日月朝則上士受之日月中則下士受之其餘差以尊卑多少則悉矣管子曰明王有四禁春無殺伐無割大陵伐大木斬大山行大火誅大臣收穀賦錢夏無遏水達名川塞大谷動土功射鳥獸秋無赦過釋罪緩刑冬無爵賞祿傷伐五藏故春政不禁則五穀不成夏政不禁則草木不榮秋政不禁則姦邪不勝冬政不禁則地氣不藏四者俱犯則陰陽不和風雨不時火流邑大風飄屋折樹木地草天冬雷草木夏落而秋蟲不藏宜死者生宜蟄者鳴多膳蕃蟲也六畜不蕃民多夭死國貧法亂逆

氣下生故曰臺榭相望者三國之簾也馳車充國者
追察之馬也翠羽朱飾者斬生之斧也五采纂組者
蕃功之室也明王知其然故遠而不近能去此取彼
則主道備也續漢書曰建武二年尹敏上疏曰六沴
作見若是供御帝用不差神則大喜五福乃降用章
于下若不供御六罰既侵六極其下明供御則天報
之福不供御則禍災至欲尊六事之體則貌言視聽
思心之用合六事之揆以致乎太平而消除輶軻孽
害也

建武元年赤眉賊率樊崇逢安等共立劉
盆子爲天子然崇等視之如小兒百事自
由初不恤錄也後正旦至君臣欲共饗旣
坐酒食未下群臣更起亂不可整時大司

農楊音案劔怒曰小兒戲尚不如此其後
遂破壞崇安等皆誅死唯音爲關內侯以
壽終

光武崩山陽王荆哭不哀作飛書與東海
王勸使作亂明帝以荆同母弟太后在故
隱之後徙王廣陵荆遂坐後謀反自殺也
章帝時竇皇后兄憲以皇后甚幸於上故
人人莫不畏憲於是強請奪沁水長公
主田公主畏憲與之憲乃賤顧之後上幸

公主田覺之問憲憲又上言借之上以后
故但譴勅之不治其罪後章帝崩竇太后
攝政憲秉機密忠直之臣與憲忤者憲多
害之其後憲兄弟遂皆被誅

桓帝時梁冀秉政兄弟貴盛自恣好驅馳
過度至於歸家猶馳驅入門百姓號之曰
梁氏滅門驅馳後遂誅滅

和帝永元十年十三年十四年十五年皆

淫雨傷稼

古今注曰光武建武六年九月大雨連
月昔稼更生鼠巢樹上十七年雒陽暴

雨壞民廬舍壓
殺人傷害禾稼

安帝元年四年秋郡國十一淫雨傷稼

方儲對策

曰雨不時節
妄賞賜也

永寧元年郡國三十三淫雨傷稼

建光元年京都及郡國二十九淫雨傷稼

是時羌反久未平百姓屯戍不解愁苦

延光元年郡國二十七淫雨傷稼

案本傳陳忠奏

以爲王侯二千石爲女使
伯榮獨拜車下柄在臣妾

二年郡國五連雨傷稼

順帝永建四年司隸荊豫充冀部淫雨傷稼

六年冀州淫雨傷稼

桓帝延熹二年夏霖雨五十餘日是時大將軍梁冀秉政謀害上所幸鄧貴人母宣冀又擅殺議郎邴尊上欲誅冀懼其持權日久威勢強盛恐有逆命害及吏民密與近臣中常侍單超等圖其方略其年八月冀卒伏罪誅滅

案公沙穆傳永壽元年霖雨大水三輔以東莫不湮沒

靈帝建寧元年夏霖雨六十餘日是時大將軍竇武謀變廢中官其年九月長樂五官史朱瑀等共與中常侍曹節起兵先誅武交兵闕下敗走追斬武兄弟死者數百

人案武死無兄弟有兄子

熹平元年夏霖雨七十餘日是時中常侍曹節等共誣曰勃海王悝謀反其十月誅悝

中平六年夏霖雨八十餘日是時靈帝新

棄羣臣大行尚在梓宮大將軍何進與佐
軍校尉袁紹等共謀欲誅廢中官下文陵
畢中常侍張讓等共殺進兵戰京都死者
數千

更始諸將軍過雒陽者數十輩皆憤而衣
婦人衣繡擁髯時智者見之以爲服之不
中身之災也乃奔入邊郡避之是服妖也
其後更始遂爲赤眉所殺

恒帝元嘉中京都婦女作愁眉啼粧墮馬

髻折要步齟齬笑所謂愁眉者細而曲折

啼粧者薄拭目下若啼處墮馬髻者作一

邊

梁冀別傳曰冀婦女又有不聊生髻

折要步者足不在體

下齟齬笑者若齒痛樂不欣欣始自大將

軍梁冀家所爲京都歎然諸夏皆放效此

近服妖也梁冀二世上將婚媾王室大作

威福將危社稷天誡若曰兵馬將往收捕

婦女憂愁蹙眉啼泣吏卒掣頓折其要脊

令髻傾邪雖強語笑無復氣味也到延熹

二年舉宗誅夷

延熹中梁冀誅後京都憤顏短耳長短上
長下時中常侍單超左悺徐璜具瑋唐衡
在帝左右縱其姦慝海內愠曰一將軍死
五將軍出家有數侯子弟列布州郡賓客
雜襲騰翦上短下長與梁冀同占到其八
年相帝因日蝕之變乃拜故司徒韓寅爲
司隸校尉以次誅鉏京都正清

臣昭案本傳
寅誅左悺

具瑋雖剋折姦首羣闖
相蒙京都未爲正清

延熹中京都長者皆著木屐婦女始嫁至
作漆畫五采爲系此服妖也到九年黨事
始發傳黃門北寺臨時惶惑不能信天任
命多有逃走不就考者九族拘繫及所過
歷長少婦女皆被桎梏應木屐之象也

靈帝建寧中京都長者皆以葦方笥爲糶
具下士盡然時有識者竊言葦方笥郡國
讞篋也今珍用之此天下人皆當有罪讞
於理官也到光和三年癸丑赦令詔書吏

民依黨禁錮者赦除之有不見文他以類
比疑者讞於是諸有黨郡皆讞廷尉人名
悉入方笥中

靈帝好胡服胡帳胡牀胡坐胡飯胡空侯
胡笛胡舞京都貴戚皆競爲之此服妖也
其後董卓多擁胡兵填塞街衢虜掠宮掖
發掘園陵

靈帝於宮中西園駕四白驢躬自操轡驅
馳周旋以爲大樂於是公卿貴戚轉相放

效至乘輜輶以爲騎從互相侵奪賈與馬
齊案易曰時乘六龍以御天行天者莫若
龍行地者莫如馬詩云四牡騤騤載是常
服檀車煌煌四牡彭彭夫驢乃服重致遠
上下山谷野人之所用耳何有帝王君子
而驂服之乎遲鈍之畜而今貴之天意若
曰國且大亂賢愚倒植凡執政者皆如驢
也其後董卓陵虐王室多援邊人以充本
朝胡夷異種跨蹈中國

熹平中省內冠狗帶綬以爲笑樂有一狗
突出走入司徒府門或見之者莫不驚怪

素山松書曰光和四年又
於西園弄狗以配人也

京房易傳曰君不正

臣欲篡厥妖狗冠出後靈帝寵用便嬖子
弟永樂賓客鴻都羣小傳相汲引公卿牧
守比肩是也又遣御史於西鄉賣官關內
侯顧五百萬者賜與金紫詣闕上書占令
長隨縣好醜豐約有賈強者貪如豺虎弱
者略不類物實狗而冠者也司徒古之丞

相壹統國政天戒若曰宰相多非其人尸
祿素餐莫能據正持重阿意曲從今在位
者皆如狗也故狗走入其門

應劭曰靈帝數以車騎將軍過

拜孽臣內孽又贈亡人顯號加於頑凶印綬汗於腐屍昔辛有睹被髮之祥知其爲戎今假號雲集不亦
宜乎

靈帝數遊戲於西園中今後宮采女爲客
舍主人身爲商賈服行至舍采女下酒食
因共飲食以爲戲樂此服妖也其後天下

大亂

風俗通曰時京師賓婚嘉會皆作魁擲酒酣之後續以挽歌魁擲喪家之樂挽歌執紼相

偶和之者天戒若曰國家當急殄悴諸貴樂皆死亡
也自靈帝崩後京師壞滅戶有兼屍蟲而相食魁擿
挽歌斯之効乎

獻帝建安中男子之衣好爲長躬而下甚
短女子好爲長裙而上甚短時益州從事
莫嗣以爲服妖是陽無下而陰無上也天
下未欲平也後還遂大亂

袁山松曰
禪位於魏

靈帝光和元年南宮侍中寺雌雞欲化雄
一身毛皆似雄但頭冠尚未變詔以問議
郎蔡邕邕對曰貌之不恭則有雞禍宣帝

黃龍元年未央宮雌雞化爲雄不鳴無距
是歲元帝初即位立王皇后至初元元年
丞相史家雌雞化爲雄冠距鳴將是歲后
父禁爲平陽侯女立爲皇后至哀帝晏駕
后攝政王莽以后兄子爲大司馬由是爲
亂臣竊推之頭元首人君之象今雞一身
已變未至於頭而上知之是將有其事而
不遂成之象也若應之不精政無所改頭
冠或成爲患茲大是後張角作亂稱黃巾

後漢書卷三十三
遂破壞四方疲於賦役多叛者上不改政
遂至天下大亂

桓帝永興二年四月丙午光祿勳吏舍壁
下夜有青氣視之得玉鉤玦各一鉤長七
寸二分周五寸四分身中皆雕鏤此青祥
也玉金類也七寸二分商數也五寸四分
徵數也商爲臣徵爲事蓋爲人臣引決事
者不肅將有禍也是時梁冀秉政專恣後
四歲梁氏誅滅也

延熹五年太學門無故自壞襄楷以爲太

學前疑所居

本傳楷書無前疑之言也

其門自壞文德

將喪教化廢也是後天下遂至喪亂

永康元年十月壬戌南宮平城門內屋自

壞金沴木木動也其十二月宮車晏駕

靈帝光和元年南宮平城門內屋武庫屋

及外東垣屋前後頓壞蔡邕對曰平城門

正陽之門與宮連郊祀法駕所由從出門

之最尊者也武庫禁兵所藏東垣庫之外

障易傳曰小人在位上下咸悖厥妖城門
內崩潛潭巴曰宮瓦自墮諸侯強陵主此
皆小人顯位亂法之咎也其後黃巾賊先
起東方庫兵大動皇后同父兄何進爲大
將軍同母弟苗爲車騎將軍兄弟並貴盛
皆統兵在京都其後進欲誅廢中官爲中
常侍張讓段珪等所殺兵戰宮中闕下更
相誅滅天下兵大起

三年二月公府駐駕廡自壞南北三十餘

間

中平二年二月癸亥廣陽城門外上屋自
壞也獻帝初平二年三月長安宣平城門
外屋無故自壞至三年夏司徒王允使中
郎將呂布殺太師董卓夷三族

袁山松曰李
傕等攻破長

安城害
允等

興平元年十月長安市門無故自壞至二
年春李傕郭汜鬪長安中傕迫劫天子移
置傕塢盡燒宮殿城門官府民舍放兵寇

鈔公卿以下冬天子東還雒陽催汜追上

到曹陽虜掠乘輿輜重殺光祿勳鄧淵廷

尉宣璠少府田邠等數十人五行傳曰好

攻戰鄭玄注曰參伐為武府攻戰之象輕百姓鄭玄注曰輕之

秋傳曰師出不正反戰不正勝也飾城郭鄭玄注曰昴畢間為天街甘氏經曰天街

保塞孔塗道衢保塞城郭之象也月令曰四鄙入保侵邊境鄭玄注曰畢主邊兵則

金不從革鄭玄注曰君行此四者為逆天西宮之政西宮於地為金金性從刑而革

人所用為器者也無故治之不銷或入火飛亡或鑄之裂形是為不從革其他變異皆屬沴也洪範曰從

革作辛馬融曰金之性從人而更可銷鑠也漢書謂音義曰言人君言不見從則金鐵亦不從人意謂

金失其性而為災也又曰言之不從是謂

不义

鄭玄曰义治也君言不從則是不能治其事也

厥咎僭

鄭玄曰君臣不治則僭差

矣

厥罰恒陽

鄭玄曰金主秋秋氣殺殺氣失故常陽也春秋考異郵曰君行非是

則言不見從言不見從則下不治下不治則僭差過

制度奢侈驕泰天子僭天大夫僭人主諸侯僭上陽

無以制從心之喜上憂下則常陽從之推設其跡考

之天意則大旱不雨而民庶大災傷淮南子曰殺不

辜則國

厥極憂

鄭玄曰殺氣失故於人為憂

時則有詩妖

赤地

鄭玄曰詩時則有介蟲之孽

鄭玄曰蜚蠊蝻蟬之類生於火而藏

之言志也

時則有犬禍

鄭玄曰犬畜之以口吠守者屬言

時則

於秋者也屬金

有口舌之病

鄭玄曰言氣失之病

時則有白眚白祥惟

木沴金介蟲劉歆傳以爲毛蟲又治也

安帝永初元年十一月民訛言相驚司隸

并冀州民人流移時鄧太后專政婦人以

順爲道故禮夫死從子之命今專王事此

不從而僭也

古今注曰章帝建初五年東海魯國東平山陽濟陰陳留民訛言相驚有

賊捕至京師民皆入城也

世祖建武

古今注曰建武三年七月雒陽大旱帝至南郊求雨即日雨

五年

夏旱京房傳曰欲德不用茲謂張厥災荒

其旱陰雲不雨變而赤因四陰衆出過時

茲謂廣其旱不生上下皆蔽茲謂隔其旱
天赤三月時有雹殺飛禽上緣求妃茲謂
僭其旱三月大溫亡雲君高臺府茲謂犯
陰侵陽其旱萬物根死有火災庶位踰節
茲謂僭其旱澤物枯爲火所傷春秋考異郵曰國大旱冤
獄結旱者陽氣移精不施君上失制奢淫僭差氣亂
感天則旱徵見又云陰厭陽移君淫民惡陰精不舒
陽偏不施又云陽偏民怨徵也在所以感之者上奢
則求多求多則下竭下竭則潰君不仁管子曰春不
收枯骨伐枯木而起去之則夏旱方儲對策曰百姓
苦士卒煩碎責租稅失中暴師外營經歷三時內有
怨女外有曠夫王者孰惟其祥揆合於天圖之事情
旱災可除夫旱者過日天王無意於百姓恩德不行

萬民煩擾故天應以無澤

是時天下僭逆者未盡誅軍多

過時

古今注曰建武六年六月九年春十二年五月二十一年六月明帝永平元年五月八年

冬十一年八月十五年

八月十八年三月並旱

章帝章和二年夏旱時章帝崩後竇太后

兄弟用事奢僭

古今注曰建初二年夏雒陽旱四年夏元和元年春並旱案楊

終傳建初元年大旱穀貴終以爲廣陵楚淮陽濟南之獄徙者數萬人吏民怨曠上疏云久旱孔叢曰建

初元年大旱天子憂之侍御史孔子豐乃上疏曰臣聞爲不善而災報得其應也爲善而災至遭時運也

陛下即位日淺視民如傷而不幸耗旱時運之會耳非政教所致也昔成湯遭旱因自責省畋散積減御

損食而大有年意者陛下未爲成湯之事焉天子納其言而從之三日雨即降轉拜黃門郎典東觀事一

和帝永元六年秋京都旱時雒陽有冤囚

和帝幸雒陽寺錄囚徒理冤囚牧令下獄

抵罪行未還宮澍雨降古今注曰永元二年郡國十四旱十五年

丹陽郡國二十二並旱或傷稼安帝古今注曰永初元年郡國八旱分遣議郎請雨案本紀二年五月旱

皇太后幸雒陽寺錄囚徒即日降雨六月京都及郡國四十大水雖去旱得水無救為災

永初六年夏旱古今注曰三年郡國八四年五年夏並旱

七年夏旱

元初元年夏旱

二年夏旱三年夏旱時西羌寇亂軍屯相繼連十餘年

六年夏旱

古今注曰建光元年郡國四旱延光元年郡國五並旱傷稼

順帝永建三年夏旱

五年夏旱

陽嘉二年夏旱時李固對策以爲奢僭所

致也

臣昭案本紀元年二月京師旱郎顗傳人君恩澤不施於民祿去公室臣下專權所致也

又周舉傳三年河南三輔大旱五穀傷災天子親自露坐德陽殿東廂請雨

沖帝永嘉元年夏旱時沖帝幼崩太尉李固勸太后及兄梁冀立嗣帝擇年長有德者天下賴之則功名不朽年幼未可知如

後不善悔無所及時太后及冀貪立年幼

欲久自專遂立質帝八歲此不用德

古今注曰

本初元年二

月京師旱

桓帝元嘉元年夏旱是時梁冀秉政妻子並受封寵踰節

延熹元年六月旱

京房占曰人君無施澤惠利於下則致旱也不救必蝗蟲

害穀其救也賞譴罰行寬大惠兆民勞功吏賜鰥寡稟不足案陳蕃上疏宮女多聚不御憂悲之感以致水旱之困也

靈帝熹平五年夏旱

蔡邕作伯夷叔齊碑曰熹平五年天下大旱禱

請名山求獲荅應時處士平陽蘇騰字玄成夢陟首陽有神馬之使在道明覺而思之以其夢陟狀上聞天子開三府請雨使者與郡縣戶曹掾吏登山外祠手書要曰君況我聖主以洪澤之福天尋興雲即降甘雨也

六年夏旱

光和五年夏旱

六年夏旱是時常侍黃門僭作威福

獻帝興平元年秋長安旱是時李傕郭汜

專權縱肆

獻帝起居注曰建安十九年夏四月旱

更始時南陽有童謠曰諧不諧在赤眉得

不得在河北是時更始在長安世祖爲大
司馬平定河北更始大臣並僭專權故謠
妖作也後更始遂爲赤眉所殺是更始之
不諧在赤眉也世祖自河北興

世祖建武六年蜀童謠曰黃牛白腹五銖
當復是時公孫述僭號於蜀時人竊言王
莽稱黃述欲繼之故稱白五銖漢家貨明
當復也述遂誅滅王莽末天水童謠曰出
吳門望緹羣見一蹇人言欲上天今天可

後漢書卷之十三
上地上安得民時隗囂初起兵於天水後
意稍廣欲爲天子遂破滅囂少病蹇吳門
冀郭門名也緹羣山名也

順帝之末京都童謠曰直如弦死道邊曲
如鉤反封侯案順帝即世孝質短祚大將
軍梁冀貪樹疏幼以爲己功專國號令以
贍其私太尉李固以爲清河王雅性聰明
敦詩悅禮加又屬親立長則順置善則固
而冀建白太后策免固徵蠡吾侯遂即至

尊固是日幽斃于獄暴屍道路而太尉胡
廣封安樂鄉侯司徒趙戒厨亭侯司空袁
湯安國亭侯云

淵聖
御名

帝之初天下童謠曰小麥青青大麥枯

誰當穫者婦與姑丈人何在西擊胡吏買
馬君具車請爲諸君鼓隴胡案元嘉中涼
州諸羌一時俱反南入蜀漢東抄三輔延
及并冀大爲民害命將出衆每戰常負中
國益發甲卒麥多委棄但有婦女穫刈之

也吏買馬君具車者言調發重及有秩者
也請爲諸君鼓隴胡者不敢公言私咽語
栢帝之初京都童謡曰城上烏尾畢逋公
爲吏子爲徒一徒死百乘車車班班入河
閒河閒姹女工數錢以錢爲室金爲堂石
上慊慊春黃梁梁下有懸鼓我欲擊之丞
卿怒案此皆謂爲政貪也城上烏尾畢逋
者處高利獨食不與下共謂人主多聚斂
也公爲吏子爲徒者言蠻夷將畔逆父旣

爲軍吏其子又爲卒徒往擊之也一徒死

百乘車者言前一人往討胡既死矣後又

遣百乘車往

臣昭曰志家此釋豈未盡乎往徒一死何用百乘其後驗竟爲靈帝

作此言一徒似斥靈帝貴任羣闡參委機政左右前後莫非刑人有同囚徒之長故言寄一徒也且又

弟則廢黜身無嗣魁然單獨非一而何百乘車者乃國之君解憤後街正膺斯數繼以班班尤得以類焉

車班班入河閒者言上將崩乘輿班班入

河閒迎靈帝也

應劭釋此句云徵靈帝者輪班擁節入河閒也

河閒

姹女工數錢

一本作妖女

以錢爲室金爲堂者靈

帝既立其母永樂太后好聚金以爲堂也

石上慊慊春黃梁者言永樂雖積金錢慊
慊常苦不足使人春黃梁而食之也梁下
有懸鼓我欲擊之丞卿怒者言永樂主教
靈帝使賣官受錢所祿非其人天下忠篤
之士怨望欲擊懸鼓以求見丞卿主鼓者
亦復諂順怒而止我也

淵聖
御名

帝之初京師童謠曰游平賣印自有平
不辟豪賢及大姓案到延熹之末鄧皇后
以譴自殺乃以竇貴人代之其父名武字

游平拜城門校尉及太后攝政爲大將軍
與太傅陳蕃合心戮力惟德是建印綬所
加咸得其人豪賢大姓皆絕望矣

桓帝之末京都童謡曰茅田一頃中有井
四方纖纖不可整嚼復嚼今年尚可後年

饒

風俗通
作饒

案易曰拔茅茹以其彙征吉茅

喻羣賢也井者法也于時中常侍管霸蘇
康憎疾海內英哲與長樂少府劉嚳太常

許詠尚書柳分

泰山松書曰柳分權豪
之黨爲范滂所奏者

尋穆

史佚

佚後亦爲司隸應劭曰
史佚左官嬀進者也

司隸唐珍等代

作脣齒河內牢川詎闕上書汝潁南陽上
采虛譽專作威福甘陵有南北二部三輔
尤甚由是傳考黃門北寺始見廢閣茅田
一頃者言羣賢衆多也中有井者言雖阨
窮不失其法度也四方纖纖不可整者言
姦慝大熾不可整理嚼復嚼者京都飲酒
相強之辭也言食肉者鄙不恤王政徒耽
宴飲歌呼而已也今年尚可者言但禁錮

也後年饒者陳竇被誅天下大壞

桓帝之末京都童謡曰白蓋小車何延延

河間來合諧河間來合諧案解犢亭屬饒

陽河間縣也

臣昭案郡國志饒陽本屬涿後屬安平靈帝既是河間王曾孫謡言自是有樹

無俟何間之縣爲驗

居無幾何而桓帝崩使者與解犢侯

皆白蓋車從河間來延延衆貌也是時御

史劉儵建議立靈帝以儵爲侍中中常侍

侯覽畏其親近必當間己白拜儵泰山太

守因令司隸迫切殺之朝廷必長思其功

效乃拔用其弟郤致位司徒此爲合諧也

靈帝之末京都童謠曰侯非侯王非王千

乘萬騎上北芒案到中平六年史侯登躡

至尊獻帝未有爵號爲中常侍段珪等數

十人所執公卿百官皆隨其後到河上乃

得來還此爲非侯非王上北芒者也

英雄記曰京師

謠歌咸言河臘叢進獻帝臘日生也風俗通曰烏臘烏臘案逆目董卓滔天虐民窮凶極惡關東舉兵欲共誅之轉相顧望莫肯先進處處停兵數十萬若烏臘蟲相隨橫取之矣

靈帝中平中京都歌曰承樂世董逃遊四

郭董逃蒙天恩董逃帶金紫董逃行謝恩

董逃整車騎董逃垂欲發董逃與中辭董

逃出西門董逃瞻宮殿董逃望京城董逃

日夜絕董逃心摧傷董逃楊孚卓傳曰卓改為董安案

董謂董卓也言雖跋扈縱其殘暴終歸逃

竄至於滅族也風俗通曰卓以董逃之歌主為已發大禁絕之死者千數靈帝

之未禮樂崩壞賞刑失中毀譽無驗競飾偽服以湯典制遠近翕然咸名後生放聲者為時人有識者竊

言舊曰世人次曰俗人今更曰時人此天促其期也其間無幾天下大壞也

獻帝踐祚之初京都童謡曰千里草何青

青十日卜不得生案千里草爲董十日卜
爲卓凡別字之體皆從上起左右離合無
有從下發端者也今二字如此者天意若
曰卓自下摩上以臣陵君也青青者暴盛
之貌也不得生者亦旋破亡

獻帝初童謠曰
燕南垂趙北際

中央不合大如礪唯有此中可避世公孫瓚以爲易
地當之遂徙鎮焉乃修城積穀以待天下之變建安
三年袁紹攻瓚瓚大敗縊其姊妹妻子引火自焚紹
兵趣登臺斬之初瓚破黃巾殺劉虞乘勝南下侵據
齊地雄威大振而不能開廓遠圖欲以堅
城觀時坐聽圍戮斯亦自易地而去世也

建安初荊州童謠曰八九年開始欲衰至

十三年無子遺言自中興以來荊州無破
亂及劉表爲牧又豐樂至此逮八九年當
始衰者謂劉表妻當死諸將並零落也十
三年無子遺者言十三年表又當死民當

移詣冀州也

干寶搜神記曰是時華容有女子忽啼呼云有大喪言語過差縣以爲妖

言繫獄百餘日忽於獄中哭曰劉荊州今日死華容去州數日即遣馬吏驗視表果死縣乃出之續又歌吟曰不意李立爲貴人後無幾曹公平

荊州以涿郡李立字建賢爲荊州刺史

順帝陽嘉元年十月中望都蒲陰狼殺童
兒九十七人時李固對策引京房易傳曰

君將無道害將及人去之深山全身厥災

狼食人陛下覺寤比求隱滯故狼災息

東觀

書曰中山相朱遂到官不出奉祠北嶽詔曰災暴綠類符驗不虛政失厥中狼災爲應至乃殘食孩幼朝廷愍悼思惟欲徵博訪其故山嶽尊靈國所望秩而遂比不奉祠怠慢廢典不務懇惻淫刑放濫害加孕婦毒流未生感和致災其詳思改救追復所失有不遵憲舉正以聞

靈帝建寧中羣狼數十頭入晉陽南城門

齧人

袁山松書曰光和三年正月虎見平樂觀又見憲陵上齧衛士蔡邕封事曰政有苛暴則

虎狼食人

後漢書志卷第十三



後漢書志第十四

五行五

劉昭

注補

災火

草妖

羽蟲孽

羊禍

五行傳曰棄法律

鄭玄注尚書大傳曰東井主法令也

逐功臣

鄭玄曰功臣制法律者也或曰喙主尚食七星主衣裳張爲食廚翼主天倡經曰帝曰臣作朕股肱耳目子欲左右有民汝翼子欲觀古人之象日月星辰山龍華蟲作續宗彛藻火粉米黼黻絺繡以五采章施于五色作服汝明予欲聞六律五聲八音在治忽以出納五言汝聽是則食與服樂臣之所用爲大功也
七星北有酒旗南有
殺太子
鄭玄曰五行火生土天廚翼南有器府
天文以參繼東井四

時以秋代夏殺太子之象也春秋傳曰夫以妾為

妻鄭玄曰軒轅為后妃屬南宮其大星則火不

炎上鄭玄曰君行此四者為逆天南宮之政南宮

無故因見作熱燔熾為害是為火不炎上其他變異

皆屬沴春秋考異郵曰火者陽之精也人合天氣五行陰陽極陰反陽極陽生陰故應人行以災謂火

失其性而為災也又曰視之不明是謂不

愆鄭玄曰視瞭也君視不明則是厥咎舒識曰

怠臣下有倦白黑不別賢不肖並不能憂民急氣厥

罰常燠鄭玄曰視曰火火主夏厥極疾鄭玄

氣失故於人爲疾

時則有草妖

鄭玄曰草視之物可見者莫衆於草

時則

有羸蟲之孽

鄭玄曰蠶螟蟲之類蟲之生於火而藏於秋者也

時則

有羊禍

鄭玄曰羊畜之速視者也屬視

時則有赤眚赤祥惟

水沴火羸蟲劉歆傳以爲羽蟲

建武中漁陽太守彭寵被徵書至明日潞

縣火災起城中飛出城外燔千餘家殺人

京房易傳曰上不儉下不節盛火數起燔

宮室儒說火以明爲德而主禮時寵與幽

州牧朱浮有隙疑浮見浸譖故意狐疑其

妻勸無應徵遂反叛攻浮卒誅滅

古今注曰建武六年

十二月雒陽市火二十四年正月戊子雷雨霹靂火災高廟北門明帝永平元年六月己亥桂陽見火飛來燒城寺章帝建初元年十二月北宮火燒壽安殿延及右掖門元和三年六月丙午雷雨火燒北宮朱

爵西關

和帝永元八年十二月丁巳南宮宣室殿火是時和帝幸北宮竇太后在南宮明年竇太后崩十三年八月己亥北宮盛饌門閤火是時和帝幸鄧貴人陰后寵衰怨恨上有欲廢之意明年會得陰后挾僞道事

遂廢遷于桐宮以憂死立鄧貴人爲皇后
十五年六月辛酉漢中城固南城門災此
孝和皇帝將絕世之象也其後二年宮車
晏駕殤帝及平原王皆早夭折和帝世絕

安帝

古今注曰永初元年十二月河南郡縣火燒殺百五人二年河南郡縣又失火燒五百八

十四人

永初二年四月甲寅漢陽河陽城中失

火燒殺三千五百七十人先是和帝崩有
皇子二人皇子勝長鄧皇后貪殤帝少欲
自養長立之延平元年殤帝崩勝有厥疾

不篤羣臣咸欲立之太后以前既不立勝
遂更立清河王子是爲安帝司空周章等
心不掩服謀欲誅鄧氏廢太后安帝而更
立勝元年十一月事覺章等被誅其後涼
州叛羌爲害大甚涼州諸郡寄治馮翊扶
風界及太后崩鄧氏被誅

四年三月戊子杜陵園火元初四年二月

壬戌武庫火

東觀書曰燒兵物百一十五種直千萬以上

是時羌

叛大爲寇害發天下兵以攻禦之積十餘

年未已天下厭苦兵役延光元年八月戊子陽陵園寢殿火凡災發于先陵此太子將廢之象也若曰不當廢太子以自翦如火不當害先陵之寢也明年上以讒言廢皇太子爲濟陰王後二年宮車晏駕中黃門孫程等十九人起兵殿省誅賊臣立濟陰王

四年秋七月乙丑漁陽城門樓災

順帝永建三年七月丁酉茂陵園寢災

古今

注曰二年五月戊辰守官失火燒宮藏陽嘉元年財物盡四年河南郡縣失火燒人六畜

恭陵廡災及東西莫府火

古今注曰十二月河南郡國火燒廬

舍殺人也

太尉李固以爲奢僭所致陵之初造

禍及枯骨規廣治之尤飾又上欲更造宮

室益臺觀故火起莫府燒材木永和元年

十月丁未承福殿火

臣招案楊厚傳是災

先是爵號

阿母宋娥爲山陽君后父梁商本國侯又

多益商封商長子翼當繼商爵以商生在

復更封翼爲襄邑侯追號后母爲開封君

皆過差非禮

古今注曰六年十二月雒陽酒市失火燒肆殺人

漢安元年三月甲午雒陽劉漢等百九十

七家爲火所燒

東觀書曰其九十家不自存詔賜錢廩穀古今注曰火或從室

屋間物中不知所從起數月乃止十二月雒陽失火後四年宮車比三晏

駕建和元年君位乃定桓帝建和二年五月癸丑北宮掖庭中德陽殿火及左掖門先是梁太后兄冀挾姦枉以故太尉李固杜喬正直恐害其事令人誣奏固喬而誅滅之是後梁太后崩而梁氏誅滅

延熹四年正月辛酉南宮嘉德殿火戊子
丙署火二月壬辰武庫火五月丁卯原陵
長壽門火先是臺后因賤人得幸號貴人
爲后上以后母宣爲長安君封其兄弟愛
寵隆崇又多封無功者去年春白馬令李
雲坐直諫死至此彗除心尾火連作

五年正月壬午南宮丙署火四月乙丑恭
北陵東闕火戊辰虎賁掖門火五月康陵
園寢火甲申中藏府承祿署火七月己未

南宮承善闔內火六年四月辛亥康陵東署火七月甲申平陵園寢火

八年二月己酉南宮嘉德署黃龍千秋萬歲殿皆火四月甲寅安陵園寢火閏月南宮長秋和歡殿後鉤盾掖庭朔平署各火十一月壬子德陽前殿西閭及黃門北寺

火殺人

袁山松書曰是時連月有火災諸官寺或一日再三發又夜有訛言擊鼓相驚陳蕃

劉智茂上疏諫曰古之火皆君弱臣強極陰之變也前始春而獄刑慘故火不炎上前入春節連寒木冰暴風折樹又八九州郡並言隕霜殺菽春秋晉執季孫行父木爲之冰夫氣弘則景星見化錯則五星開

日月蝕災爲已然異爲方來恐卒有變必於三朝唯善政可以已之願察臣前言不棄愚忠則元元幸甚

書奏不省

九年三月癸巳京都夜有火光轉行

民相驚譟

袁山松書曰是時宦賢專朝鉤黨事起上尋無嗣陳蕃竇武爲曹節等所害天

下無復紀綱

靈帝熹平四年五月延陵園災

光和四年閏月辛酉北宮東掖庭永巷署

災

陳蕃諫云楚女悲而西宮災不御宮女怨之所致也

五年五月庚申德陽前殿西北入門內永

樂太后宮署火

中平二年二月己酉南宮雲臺災庚戌樂

城門災

南宮中門

延及北闕道西燒嘉德和歡

殿案雲臺之災自上起攘題數百同時並
然若就縣華鎗其日燒盡延及白虎威興
門尚書符節蘭臺夫雲臺者乃周家之所
造也圖書術籍珍玩寶怪皆所藏在也京
房易傳曰君不思道厥妖火燒宮是時黃
巾作慝變亂天常七州二十八郡同時俱
發命將出衆雖頗有所禽然宛廣宗曲陽

尚末破壞役起負海杼抽空懸百姓死傷
已過半矣而靈帝曾不克己復禮虐侈滋
甚尺一兩布騶騎電激官非其人政以賄
成內嬖鴻都並受封爵京都爲之語曰今
茲諸侯歲也天戒若曰放賢賞淫何以舊
典爲故焚其臺門祕府也其後三年靈帝
暴崩續以董卓之亂火三日不絕京都爲

丘墟矣

魏志曰魏明帝青龍二年崇華殿災詔問太史令高堂隆此何咎於禮寧有祈禳之

義乎對曰夫災變之發皆所以明教誡也唯率禮修德可以勝之易傳曰上不儉下不節孽火燒其室又

曰君高其臺天火爲災此人君苟飾官室不知百姓
空竭故天應之以旱火從高殿起也上天降監故譴
告陛下陛下宜增崇人道以荅天意昔太戊有桑穀
生於朝武丁有雉雉登於鼎皆聞災恐懼側身修德
三年之後遠夷朝貢故號曰中宗高宗此則前代之
明鑒也今案舊占災火之發皆以臺榭宮室爲誠然
今官室之所以充廣者實由宮人猥多之故宜簡擇
留其淑懿如周之制罷省其餘此則祖乙之所以訓
高宗高宗之所以享遠號也詔問隆吾聞漢武帝時
柏梁災而起宮殿以厭之其義云何對曰臣聞西京
柏梁旣災越巫陳方建章是營以厭火祥乃夷越之
巫所爲非聖賢之明訓也五行志曰柏梁災其後有
江充巫蠱衛太子事如志之言越巫建章無所厭也
孔子曰災者修類應行精祲相感以戒人君是以聖
主觀災責躬退以修德以消復之今宜罷散民役宮
室之制務從約節內足以待風雨外足以講禮儀清
掃所災之處不敢於此有所立作萑莆嘉禾必生此
地以報陛下虔恭之德疲民之力竭民之財實非所

以致符瑞而懷遠人也臣昭曰高堂隆之言災其得天心乎雖與本志所明不同靈帝之時有焉故載其言廣災異也

獻帝初平元年八月霸橋災其後三年董

卓見殺

臣昭案劉焉傳興平元年天火燒其城府輜重延及民家館邑無餘也

庶徵之恒燠漢書以冬溫應之中興以來

亦有冬溫而記不錄云

越絕范蠡曰春燠而不生者王者德不亨也夏

寒而不長者臣下不奉主令也秋暑而復榮者百官刑不斷也冬溫而泄者發府庫賞無功也此四者邦之禁也管子曰臣秉君威則陰侵陽盛夏雪降冬不冰也

安帝元初三年有瓜異本共生一瓜同蒂

時以爲嘉瓜或以爲瓜者外延離本而實
女子外屬之象也是時閭皇后初立後閭
后與外親耿寶等共譖太子廢爲濟陰王
更外迎濟北王子犢立之草妖也

古今注曰
和帝永元

七年三月江夏縣民舍柱生兩枝其一長尺五
寸分爲八枝其一長尺六寸分爲五枝皆青也

帝延熹九年雒陽城局竹柏葉有傷者

占曰天子凶

靈帝熹平三年右校別作中有兩樗樹皆
高四尺所其一株宿夕暴長長丈餘大一

圍作胡人狀頭目鬚鬚髮備具京房易傳

曰王德衰下人將起則有木生人狀

臣昭以木

生人狀下人將起京房之占雖以證驗貌類胡人猶未辨了董卓之亂實擁胡兵催汜之時充斥尤甚遂窺間宮嬪剽虐百姓鮮卑之徒踐藉畿封胡之害深亦已毒矣

五年十月壬午御所居殿後槐樹皆六七

圍自拔倒豎根在上

臣昭曰槐是三公之象貴之也靈帝授位不以德進

貪愚是外清賢斯黜槐之倒植豈以斯乎

中平元年夏東郡陳留濟陽長垣濟陰冤

句離狐縣界

風俗通曰西及城皇陽武城郭路邊

有草生其莖

靡累腫大如手指狀似鳩雀龍蛇鳥獸之

形五色各如其狀毛羽頭目足翅皆具

俗風

通曰亦作人狀操持兵弩萬萬備具非但仿佛類良熟然也近草妖也是歲

黃巾賊始起皇后兄何進異父兄朱苗皆

為將軍領兵後苗封濟陽侯進苗遂秉威

權持國柄漢遂微弱自此始焉

應劭曰關東義兵先起於

宋衛之郊東郡太守橋瑁負眾怙亂陵蔑同盟忿賊同類以殞厥命陳留濟陰迎助謂為離德棄好即戎

吏民藏之草妖之興豈不或信

中平中長安城西北六七里空樹中有人

面生鬚

魏志曰建安二十五年正月曹公在雒陽起建始殿伐濯龍樹而血出又掘徙梨根

傷而血出曹公惡之遂寢疾是月薨

獻帝興平元年九月桑復生堪可食

臣昭曰桑

重生堪誠是木異必在濟民安知非瑞乎時蒼生死敗周秦殲盡饑餓餒鬼不可勝言食此重樵大拯危命雖連理附枝亦不能及若以爲怪則建武野穀旅生麻菽尤盛復是草妖邪

安帝延光三年二月戊子有五色大鳥集

濟南臺十月又集新豐時以爲鳳皇或以

爲鳳皇陽明之應故非明主則隱不見凡

五色大鳥似鳳者多羽蟲之孽是時安帝

察也

臣昭曰已論之於敝傳

記者以爲其後章帝崩以

信中常侍樊豐江京阿母王聖及外屬耿寶等讒言免太尉楊震廢太子爲濟陰王不愆之異也章帝末號鳳皇百四十九見時直臣何敞以爲羽孽似鳳翔翔殿屋不

爲驗案宣帝明帝時五色鳥羣翔殿屋賈逵以爲胡降徵也帝多善政雖有過不及至衰缺末年胡降二十萬口爾其驗也帝之時羌胡外叛讒慝內興羽孽之時也樂

叶圖徵說五鳳皆五色爲瑞者一爲孽者

四

叶圖徵曰似鳳有四並爲妖一曰鸛鸛鳩喙圓目身義戴信嬰禮膺仁負智至則旱役之感也二曰

發明烏喙大頸翼大大脰身仁戴智嬰義膺信負禮至則喪之感也三曰焦明長喙疏翼圓尾身義戴信

嬰仁膺智負禮至則水之感也四曰幽昌兪目小頭大身細足脰若鱗葉身智戴信負禮膺仁至則旱之

感也國語曰周之興也鸞鸞鳴岐說文曰五方神鳥東方曰發明南方曰焦明西方曰鸛鸛此方曰幽昌

中央曰

鳳皇

桓帝元嘉元年十一月五色大鳥見濟陰

已氏時以爲鳳皇此時政治衰缺梁冀秉

政阿枉上幸亳后皆羽孽時也

臣昭案魏朗對策桓帝時

維入太常宗正府
即說見本傳注

靈帝光和四年秋五色大鳥見于新城衆
鳥隨之時以爲鳳皇時靈帝不恤政事常
侍黃門專權羽孽之時也衆鳥之性見非
常班駁好聚觀之至於小爵希見梟者競
見猶聚

中平三年八月中懷陵上有萬餘爵先極
悲鳴已因亂鬪相殺皆斷頭懸著樹枝枳
棘到六年靈帝崩大將軍何進以內寵外

嬖積惡日久欲悉糾黜以隆更始元政而
太后持疑事久不決進從中出於省內見
殺因是有司盪滌虔劉後祿而尊厚者無
餘矣夫陵者高大之象也天戒若曰諸懷
爵祿而尊厚者還自相害至滅亡也

古今注曰建武

九年六郡八縣鼠食稼張璠紀曰初平元年三月獻
帝初入未央官翟雉飛入未央官獲之獻帝春秋曰
建安七年五色大鳥集魏郡衆鳥數千隨之
魏志曰二十三年禿鶩集鄴官文昌殿後池

桓帝建和三年秋七月北地廉雨肉似羊

肋

說文曰肋脅骨也

或大如手近赤祥也是時梁

太后攝政兄梁冀專權枉誅漢良臣故太尉李固杜喬天下冤之其後梁氏誅滅

後漢書志第十四